

„Službene novine Bosansko-podrinjskog kantona Goražde“ br. 10/16)

Na osnovu člana 58. Zakona o osnovnom odgoju i obrazovanju („Službene novine Bosansko-podrinjskog kantona Goražde“ broj: 5/16), Ministarstvo za obrazovanje, mlade, nauku, kulturu i sport Bosansko-podrinjskog kantona Goražde, donosi:

PRAVILNIK O IZBORU UČENIKA GENERACIJE U OSNOVNIM ŠKOLAMA SA PODRUČJA BOSANSKO-PODRINJSKOG KANTONA GORAŽDE

I OPĆE ODREDBE

Član 1.

Ovim se Pravilnikom propisuje način izbora učenika generacije završnih razreda redovnih i paralelnih osnovnih škola sa područja Bosansko-podrinjskog kantona Goražde.

Član 2.

Učenikom generacije može postati onaj učenik koji ispunjava sljedeće uvjete:

- a) Da je u toku školovanja imao odličan uspjeh u svim razredima, odnosno da je ostvario odlična ili izuzetna postignuća kod opisnog ocjenjivanja;
- b) Da je u toku školovanja imao primjerno vladanje u svim razredima;
- c) Da je u toku školovanja imao zapažene rezultate na takmičenjima, smotrama, slobodnim aktivnostima i sl.

Član 3.

(1) Prilikom bodovanja učenika za izbor učenika generacije u obzir se uzima učešće u radu sekcija predviđenih godišnjim programom rada u školi, takmičenja u znanju i stvaralaštvu, osvojene nagrade na raznim konkursima likovnog, muzičkog, jezičkog i tehničkog stvaralaštva te raznim sportskim aktivnostima provedenim u organizaciji matične škole, Pedagoškog zavoda, Ministarstva za obrazovanje, mlade, nauku, kulturu i sport Bosansko-podrinjskog kantona Goražde (u daljem tekstu: Ministarstvo), Federalnog ministarstva obrazovanja i nauke te evropskih i svjetskih asocijacija koje se bave pitanjem odgoja i obrazovanja.

(2) S ciljem jednoobraznog pristupa, Pedagoški zavod će svim osnovnim školama blagovremeno, a najkasnije do 15. aprila tekuće školske godine, dostaviti ažuriran spisak takmičenja koja će se u skladu sa stavom 1. ovog člana vrednovati u toj školskoj godini.

(3) U slučaju da se na spisku iz stava 2. ovog člana ne nalazi neko takmičenje koje se po mišljenju škole, učenika, roditelja i drugih treba vrednovati, konačan sud po zahtjevu o tom takmičenju donosi Ministarstvo, kome se zahtjev i upućuje.

Član 4.

Elementi koji se vrednuju pri rangiranju kandidata za učenika generacije su:

- a) Uspjeh u učenju tokom školovanja;
- b) Aktivnost i doprinos u radu sekcije škole;
- c) Uspjeh na takmičenjima u znanju iz pojedinih predmeta na konkursima te uspjeh na revijama, smotrama, izložbama, sportskim takmičenjima sl.
- d) Mišljenje nastavnčkog vijeća škole.

Član 5.

Pravo da bude izabran ima svaki kandidat - učenik završnog razreda koji ispunjava uvjete iz članova 2. i 3. ovog Pravilnika, prijavljivanjem na oglas koji raspisuje matična škola.

II NAČIN VREDNOVANJA AKTIVNOSTI

Član 6.

- (1) Aktivnosti iz članova 2, 3. i 4. ovog Pravilnika vrednuju se na sljedeći način:
- a) Suma prosječnih ocjena (zaokruženih na dvije decimale) na kraju svake školske godine, odnosno nastavne godine od III do IX razreda te paralelne osnovne škole od I do VI razreda, pomnožena koeficijentom 2,5.
 - a. Ukoliko je kandidat za učenika generacije neki od razreda završio u inostranstvu i nema izvedenu ocjenu općeg uspjeha ili nema pojedinačnih ocjena za nastavne predmete u nekom od tih razreda, onda se umjesto prosječne ocjene uspjeha u tim razredima uzima prosječna ocjena izvedena za sve razrede u kojima su definisane te ocjene, odnosno u kojima je moguće izvesti prosječnu ocjenu općeg uspjeha zaokruženu na dvije decimale.
 - b) Za svaku godinu rada u sekcijama slobodnih aktivnosti, na osnovu vođenja evidencije, kandidat po sekciji u svakom razredu od VI do XI razreda dobija dva boda za maksimalno dvije sekcije.
 - c) Za učešće i osvojeno mjesto na školskom, općinskom, kantonalnom, federalnom, državnom takmičenju, olimpijadi, evropskom i svjetskom takmičenju u znanju iz pojedinih predmeta, sporta (u organizaciji aktiva nastavnika tjelesnog i zdravstvenog odgoja), odnosno za osvojeno mjesto na konkursima likovnog, jezičkog, dramskog, recitatorskog, literarnog i tehničkog stvaralaštva - revije, izložbe, smotre i slične manifestacije, kandidat može dobiti sljedeći broj bodova:

	NIVO TAKMIČENJA	Broj bodova			
		I mjesto	II mjesto	III mjesto	Učešće
1.	Školsko takmičenje	3	2	1	0,5
2.	Općinsko takmičenje	6	5	4	1
3.	Kantonalno takmičenje	12	10	8	2
4.	Federalno takmičenje	18	15	12	3
5.	Državno takmičenje	24	20	16	4
6.	Olimpijade, evropska i svjetska takmičenja	30	25	20	5

- (2) Kod takmičenja iz predmeta koje organizuje Ministarstvo, bodovanje se vrši isključivo na osnovu rezultata, tj. diploma koje dodjeljuje Ministarstvo, a u skladu sa Pravilnikom o takmičenju učenika.

(3) Ukoliko se održava samo ekipno takmičenje, učeniku koji je bio član ekipe pripada 30% bodova od bodova predviđenih za pojedinačni plasman.

(4) Bodovi se mogu dobiti samo po jednom osnovu ili za plasman ili za učešće.

(5) Kod tehničkog stvaralaštva se boduje jedno priznanje i to ono koje nosi više bodova na smotri.

(6) Kod sportskih takmičenja boduju se najviše dva takmičenja u toku školske godine koje organizuje aktiv nastavnika tjelesnog i zdravstvenog odgoja.

(7) Za učenike u paralelnoj osnovnoj školi za učešće u javnim i kulturnim manifestacijama kandidatu se mogu dodijeliti bodovi:

	NIVO TAKMIČENJA	Broj bodova				
		Specijalna nagrada/laureat	I mjesto	II mjesto	III mjesto	Pohvala
	SOLO					
1.	Federalno takmičenje	20	18	15	12	3
2.	Međunarodno takmičenje	32	30	25	20	5
	KAMERNO					
1.	Federalno takmičenje	10	9	7,5	6	1,5
2.	Međunarodno takmičenje	16	15	12,5	10	2,5

(8) Za učešće u javnim i kulturnim manifestacijama u paralelnoj školi kandidatu se mogu dodijeliti bodovi:

	Nivo manifestacije	Broj bodova
A	Interna manifestacija klase	2
B	Školska manifestacija	3
C	Općinska manifestacija	4
D	Kantonalna manifestacija	5
E	Federalna manifestacija	6
F	Državna manifestacija	7
G	Međunarodna manifestacija	9

(9) Nastavničko vijeće (koje pored direktora i stručnih saradnika sačinjavaju svi nastavnici od VI do IX razreda koji su predavali kandidatima i nastavnici razredne nastave koji su predavali kandidatima za izbor učenika generacije, a za paralelne osnovne škole svi nastavnici) tajnim glasanjem kandidatima za učenika generacije dodjeljuje broj bodova po osnovu formule $A/B \times 20$; pri čemu je

A- broj glasova koji je učenik dobio

B- ukupan broj članova nastavničkog vijeća koji su učestvovali u glasanju.

III IZBOR UČENIKA GENERACIJE

Član 7.

(1) Paralelne osnovne škole izbor učenika generacije mogu vršiti na osnovu dodatnih kriterija, regulisanih svojim normativnim aktom u skladu sa ovim Pravilnikom.

(2) Učenik koji je stekao uvjete za proglašenje za učenika generacije u redovnoj i paralelnoj osnovnoj školi u isto vrijeme može biti proglašen za učenika generacije u obje škole i steći određene prinadležnosti.

Član 8.

(1) Praćenje, prikupljanje prijedloga i sumiranje rezultata u školi vrši komisija za izbor učenika generacije.

(2) Komisiju iz prethodnog stava imenuje nastavničko vijeće škole.

Član 9.

Komisiju sačinjava pet članova: pedagog škole, koji je predsjednik komisije, ili drugi član kojeg imenuje nastavničko vijeće, dva nastavnika (po jedan iz razredne i predmetne nastave), predstavnik roditelja kojeg predlaže vijeće roditelja i jedan učenik osmog razreda kojeg predloži vijeće učenika. Za člana komisije ne mogu biti birani odjeljenske starješine završnih razreda, kao ni nastavnici razredne nastave koji su vodili generaciju završnih razreda, niti roditelji čije je dijete kandidat za učenika generacije.

Član 10.

(1) Po prikupljanju podataka i provjeri istih, pristupa se bodovanju. Na osnovu broja bodova komisija sastavlja rang-listu.

(2) Ukoliko dva ili više kandidata imaju jednak broj bodova, prednost ima učenik koji ima veći broj bodova za uspjeh u učenju. Ukoliko i po ovom osnovu učenici imaju jednak broj bodova, prednost ima onaj učenik koji ima veći broj bodova za uspjeh na takmičenjima. Ukoliko i po ovom osnovu dva ili više učenika imaju jednak broj bodova, prednost ima onaj učenik koji ima veći broj bodova po osnovu uspjeha na konkursima, revijama, smotrama i slično. Ukoliko i po ovom osnovu dva ili više učenika imaju jednak broj bodova, prednost ima onaj učenik koji ima veći broj bodova na osnovu ocjene nastavničkog vijeća.

Član 11.

Nastavničko vijeće škole razmatra prijedlog komisije i donosi odluku o izboru učenika generacije škole.

Član 12.

(1) Žalba na odluku nastavničkog vijeća podnosi se školskom odboru škole u roku od tri dana nakon proglašenja učenika generacije.

(2) Odluka školskog odbora je konačna.

Član 13.

Rok za proglašenje učenika generacije je 10. juni tekuće godine.

Član 14.

Na panou škole ističe se uvećana fotografija učenika generacije i pojedinačne fotografije dva učenika ponosa generacije za škole koje broje do 300 učenika, a do pet učenika ponosa generacije za škole koje broje preko 300 učenika.

Član 15.

- 1) Škole su dužne da do 10. juna tekuće godine dostave odluku o proglašenju učenika generacije, biografiju i fotografiju učenika generacije Ministarstvu i Pedagoškom zavodu.
- 2) Proglašenje učenika generacije odgojno-obrazovnih ustanova sa područja Bosansko-podrinjskog kantona Goražde vrši se do kraja juna tekuće godine.
- 3) Općine ili drugi zainteresovani subjekti mogu da za učenika generacije organizuju odgovarajuće manifestacije i osiguraju sredstva za nagrade.
- 4) Pokrovitelj centralne manifestacije je Ministarstvo, a organizator Pedagoški zavod.

Član 16.

Učenik generacije se proglašava javno.

Član 17.

- 1) Učenik generacije dobija posebnu diplomu „Učenik generacije“, a ponosi generacije diplomu „Ponos generacije“, koje dodjeljuje škola.
- 2) U skladu sa materijalnim mogućnostima Ministarstva, općine, škole i drugih zainteresovanih, učenicima generacije se mogu dodijeliti novčane nagrade i odgovarajući pokloni.

IV PRELAZNE I ZAVRŠNE ODREDBE

Član 18.

Stupanjem na snagu ovog Pravilnika prestaje da važi Pravilnik o izboru učenika generacije osnovnih škola broj:10-38- 3955/15 od 28.12.2015.godine.

Član 19.

Ovaj Pravilnik stupa na snagu danom donošenja i bit će objavljen u „Službenim novinama Bosansko-podrinjskog kantona Goražde“.

Broj:10-38- /16

Goražde,02.08. 2016. godine

MINISTAR

Damir Žuga, prof.